

09/06/2002

PM bawa mesej tentang keganasan ke Switzerland

Khaidir Abdul Majid

ROME: Selepas berhasil dalam misinya bertemu Pope John Paul II di sini kelmarin, Datuk Seri Dr Mahathir Mohamad meneruskan usaha membawa mesej Malaysia menentang keganasan dan menjalin hubungan erat sesama negara ke Zurich, Switzerland untuk bertemu Presidennya, Kasper Villiger, esok.

Perbincangan kedua-dua pemimpin itu dan mesyuarat delegasi dijangka tertumpu kepada pertukaran pandangan dan maklumat mengenai hubungan dua hala serta isu serantau dan antarabangsa demi kepentingan bersama di antara Kuala Lumpur dan Berne.

Apa pun, pertemuan pertama Perdana Menteri dengan ketua gereja katolik di Vatican City di tengah-tengah ibu negara Itali dijangka membuka jalan kepada lebih banyak lagi pertemuan di antara Malaysia dan Vatican pada masa depan. Malah, Vatican sendiri berharap hubungan itu dipertingkatkan untuk menjalin persefahaman yang lebih tinggi antara kedua-dua pihak.

Perdana Menteri yang ditemui wartawan selepas mengunjungi Vatican kelmarin, menganggap pertemuannya dengan Pope dan pegawai Vatican sebagai berhasil, kerana Malaysia mampu menyampaikan pandangannya mengenai beberapa isu, terutama perkembangan di Palestin.

Pengerusi Majlis Fatwa Kebangsaan, Datuk Dr Ismail Ibrahim yang turut serta dalam rombongan Perdana Menteri ke Vatican berkata pertukaran pandangan dengan Vatican penting kerana Pope adalah suara yang agak berpengaruh pada peringkat dunia.

"Pope banyak mengadakan pertemuan dengan pemimpin dunia, termasuk pemimpin Amerika Syarikat dan Eropah, dan sedikit sebanyak jika kita mampu menyampaikan pandangan kepadanya, mungkin ia turut disampaikan kepada pemimpin lain yang ditemui Pope," katanya.

Malah, pertemuan Dr Mahathir dengan Vatican mendedahkan pendirian Malaysia dan Vatican tidak banyak berbeza mengenai isu Palestin.

Kedua-dua pihak bersependapat bahawa keganasan di Palestin dihentikan dan sebagai sebahagian daripada penyelesaian pihak ketiga perlu campur tangan untuk memisahkan kedua-dua pihak yang bertelagah iaitu Palestin dan Israel.

Mengenai kunjungan Perdana Menteri ke Zurich bermula hari ini, Malaysia melihat Switzerland juga seperti Malaysia tidak menggunakan pendekatan konfrontasi dalam pelbagai hal dan memperjuangkan perdamaian melalui rundingan.

Pendekatan itu memainkan peranan berkesan dalam beberapa perkara antarabangsa, khususnya mengendurkan ketegangan antara negara bertelagah.

Switzerland melihat Malaysia sebagai kuasa Asia yang berpengaruh daripada kalangan negara Asia Tenggara.

Contohnya, langkah Washington menerima kaedah dan kesungguhan Malaysia dalam menangani isu keganasan dan militan adalah pengiktirafan yang membanggakan dan sekali gus, perlu diketahui juga oleh kerajaan lain.

(END)